

SCRIPT OF MORNING GOJRI NEWS BULLETIN 25DEC 2025 1015HRS

مارننگ گوجری نیوز بولیتن 25 دسمبر 2025

یوہ آکاشوانی جموں ہے عبدل محید تیں خبر سُنو۔

CHRISTMAS

اج دنیا بھر مانہہ کریس مس مناو جارہیو ہے حضرت عیسیٰ گا یوم ولادت گا موقع ور عسائی کریسمس مناویں تے اپنا گھراں تے گرجا گھراں نانہہ کرس مس تری تے رنگ برنگی روشنیاں نال سجاویں تے اک دوجا نانہہ تحفہ دیں۔ پوپ لیو اس سال منی مانہہ منتخب ہون غے بعد پہلی بار کریس مس غی تقریبات غی صدارت کر رہیا ہیں اج پوپ کریس مس ڈے ماس مناویں گا، تے دوجا سالانہ آر بی ایٹ اور بی یعنی شہر تے دُنیا نانہہ پیغام تے دعا دیں گا ملک گا دوجا حصا غی طرح جموں کشمیر مانہہ کریس مس گو تہوار مناو جارہیو ہے لیفٹیننٹ گورنر منوج سنہا، وزیر اعلیٰ عمر عبداللہ تے دوجا کابینا وزراء نے لوکاں نانہہ کریس مس گا موقع ور مبارک باد پیش کی ہے۔

DAR WATERSHED

محکمہ زرعی پیداوار دیہی ترقی، پنچائتی راج محکمہ تے کوآپریٹو تے الیکشن محکمہ گا وزیر جاوید احمد ڈار نے کہیو ہے جے واٹر شیڈ غی ترقی، دیہی علاقہ غی ترقی، آبی تحفظ نانہہ بدھا ن تے زرعی شعبہ نانہہ مضبوط بنان مانہہ اہم کردار ادا کرے۔ انٹی گریٹڈ واٹر شیڈ منجیمنٹ پروگرام جموں کشمیر غی طرفوں محکمہ دیہی ترقی تے پنچائتی راج محکمہ غے تحت پنچائیت بہون ریلوے روڈ جموں مانہہ واٹر شیڈ مہوتسو 2025 غی تقریب مانہہ بولتا واں وزیر نے یاہ گل کہی وزیر موصوف نے واٹر شیڈ گا انتظام مانہہ عوامی شرکت یعنی جن بھاگیداری، موجودہ واٹر شیڈ اثاثاں غی بحالی تے پائیدار طریقاں نال دیہی علاقہ غی تبدیلی غی اہمیت ور زور پایو۔ انہاں نے محکمہ غی کوششاں تے بھارتی حکومت غی اسکیمیں غی تعریف کی جن کو مقصد موجودہ تے آئندہ نسلاں واسطے زیر زمین پانی غا وسائل نانہہ محفوظ کرنو ہے وزیر نے پروجیکٹاں غی عمل آوری غے دوران زمینی سطح ور شفافیت تے جوابدہی غی ضرورت ور زور پایو تانجے لوکاں نانہہ موثر خدمات غی فراہمی نانہہ یقینی بنایو جاسکے۔

RANA I&FC

صوبہ جموں گا آبپاشی تے سیلاب غی روک تھام ڈویژن گا سال 2025-26 واسطے منظور شدہ منصوباں غے تحت چل رہیا کماں غی پیش رفت گا جائزہ واسطے اک اعلیٰ سطحی میٹنگ غی جل شکتی محکمہ گا وزیر جاوید احمد رانا نے صدارت کی جائزہ غے دوران وزیر نے ہر ڈویژن مانہہ جاری تے نواں منظور شدہ منصوباں غی مالی تے عملی پیش رفت گو جائزو لینا واں افسراں نانہہ ہدایت جاری کیں جے مقررہ وقت تے معیار ور سختی نال عمل کریں تے تاخیر تے غیر معیاری عمل در آمد نانہہ برداشت نہیں کیو جائے غو۔ وزیر نے متعلقہ حکام نانہہ یاہ ہدایت وی جاری کی جے اُن کماں غی الاٹمنٹ گا عمل نانہہ تیز کیو جائے جن گا ٹینڈر پہلاں تیں ہی ہو چکا ہیں تانجے مزید دیری گے پروجیکٹاں غو کم شروع ہوسکے۔ انہاں نے افسراں ور زور پایو جے ڈی پی آر تیار کرتاں وقت جوازیت، پائیداری تے لاگت غی تاثیر ور واضع توجہ دتی جائے تمام عہدیداراں نانہہ یاہ ہدایت وی دتی گئی جے وے پروجیکٹاں ور چل رہیا کماں غی جگہ بلا ناغہ دورو لاگے کماں مانہہ پیش رفت گو جائزو لیں، تانجے مقررہ وقت مانہہ کم مکمل کیا جاسکیں تے معیار نال کوئی سمجھوتہ نہیں ہونو چاہیے۔

J&K MSME AWARD

جموں کشمیر بینک نے ایم ایس ایم ای بیکنگ ایکسپلنس ایواڈی 2025 مانہہ بیسٹ مائکرو سماں میڈیم انٹرپرائیز ایم ایس ایم ای بینک ونر ایواڈ جتیو ہے سی ایس آر انیشیٹیو اینڈ بیزنس رسپانسبیلٹی گا زمرہ مانہہ یوہ بینک دوجا مقام ور رہیو ہے نوی دہلی مانہہ منعقدہ اک اعلیٰ سطحی تقریب مانہہ

یوہ اعزاز کامرس تے صنعت گا مرکزی وزیر پیوش گوئل نے دتوہے۔ تے بنک غی طرفوں ات گیا چیف جنرل منیجر سومت کمار تے جی ایم ڈویزنل ہیڈ خرشید مظفر نے یوہ اعزاز مرکزی وزیر تیں حاصل کیو۔ امی تبا چٹرجی نے کہیو جے یوہ قومی اعزاز حاصل کرنو مہارے واسطے فخر غی گل ہے، تے اس واسطے ہوں ایم ایس ایم ای ٹیم تے سی ایس آر کم کاراں نانہہ مبارک باد دیو ہاں۔ انہاں نے مزید کہیو جے پھلیاں لوہکا تے لوہکا تے درمیانہ درجہ گا کاروباری اداراں جموں کشمیر بنک غی ترجیح رہیا ہیں، تے ہوں ہم جموں کشمیر سرکار گا فلیگ شپ مشن یووا پروگرام گو نفاذ کر رہیا ہاں جس گو مقصد آئیندہ 5 براں مانہہ 1.37 لکھ کاروباری ادارہ پیدا کرن تے 4.25 لکھ نوجواناں واسطے روزگار گا موقع پیدا کرنو ہے۔

SAKINA HEALTH

جموں کشمیر مانہہ عوام غی صحت غی دیکھ بھال بارے نظام نانہہ مضبوط کرن گا بنیادی مقصد نانہہ حاصل کرن واسطے محکمہ صحت گا عمل آوری منصوبہ غا جائیزہ واسطے سیول سیکرٹریٹ جموں مانہہ وزیر صحت، طبی تعلیم، سماجی بہبود تے تعلیم غی وزیر سکینہ اتو نے اج جائیزہ میٹنگ غی صدارت کی میٹنگ غے دوران وزیر موصوفہ نے صحت کی دیکھ بھال بارے بنیادی ڈھانچہ غی توسیع، بنیادی تے ثانوی سطح ور صحت خدمات نانہہ مضبوط کرن، انسانی ذرائع گا بہتر استعمال، نوی طبی تکنیکاں گا استعمال تے تشخیص تے ضروری دوائیاں کی دستیابی وغیرہ گو تفصیلی جائیزو لیو۔
